





男訓卷十五

容忍類

凡十七條

會稽忍耻

越勾踐之困會稽也。喟然嘆曰。吾終於此乎。種曰。湯繫夏臺。文王囚羑里。晉重耳奔翟。齊小白奔莒。而卒王伯。由此觀之。何遽不為福乎。吳既赦越。越王勾踐反國。乃苦身焦思。置膽於座。坐卧即仰膽。飲食亦嘗之。曰。汝忘會稽之耻耶。身自耕作。夫人自織。食不加肉。衣不重采。折節下賢人。厚遇賓客。賑貧弔死。與百



身言卷十五  
姓同其勞。後十年滅吳而伯。

### 引車避匿

藺相如為上卿。位居廉頗之右。頗曰。我為趙將。有攻城野戰之大功。相如徒以口舌為勞。而居上。我見必辱之。相如聞。常稱疾。不欲與爭。已而相如出。望見廉頗。相如引車避匿。其舍人耻之。欲辭去。相如曰。強秦之不敢加兵於趙者。以吾兩人在也。今兩虎共鬪。勢不俱生。吾所以為此者。先國家而後私讐故也。頗聞之。肉袒負荊謝罪。

### 小忍全吏

張耳陳餘。魏之名士。秦聞此兩人名。購求張耳千金。陳餘五百金。二人變姓名為里監門。里吏嘗笞餘。餘欲起耳躡之。使受笞。吏去。耳引餘之桑下。數之曰。始而與公言何如。今見小辱。而欲死一吏乎。

### 不罪獄吏

漢韓安國。字長孺。成安人也。初仕梁孝王。為中大夫。後得罪下獄。獄吏田甲辱之。安國曰。死灰不復然乎。田甲曰。然。即溺之。居無何。梁缺內史。漢使使者拜安



國為梁內史。田甲亡命。安國曰。田甲不就官。我滅汝宗。甲肉袒謝罪。安國笑曰。公等足與治乎。卒善遇之。不罪醉吏。

漢丙吉。字少卿。魯國人也。宣帝拜博陽侯。後為丞相。尚寬大。有馭吏嗜酒。嘗從吉出。醉吐丞相車上。西曹主吏白。欲斥之。吉曰。以醉飽之失去士。使人復何所容。此不過污丞相車茵耳。西曹第忍之。

為國容忍

漢寇恂拜潁川太守。賈復部將殺人。恂戮之。復以為耻。謂左右曰。吾與寇恂並列將帥。而為其所陷。今見恂。必手劍之。恂知其謀。不與相見。谷崇曰。崇將種也。得帶劍侍側。卒有變。足以相當。恂曰。不然。藺相如不畏秦王。而屈於廉頗者。為國也。吾安可以忘之。二人卒為斷金之契。

認稻不較

漢鍾離牧。字子幹。會稽人。少居永興。貧甚。躬自墾田。二十餘畝。臨熟。縣民有認之者。牧遂與稻。縣長聞之。召民。欲繩以法。牧曰。以稻而殺此民。何心。復留。遂出。



裝還山陰。長自往止之。為釋民罪。民率妻子舂所取  
稻得六十斛米。送還牧。牧閉門不納。民置米道旁。莫  
有取者。牧由是知名。

### 不推侮慢

蔣琬開府。加大司馬。東曹掾楊戲。素性簡畧。琬與言  
論。時不應答。或曰。戲之慢上。不亦甚乎。琬曰。人心不  
同。各如其面。戲欲贊吾是耶。則非其本心。欲反吾言。  
則顯吾之非。是以默然。督農楊敏毀琬曰。作事情憤。  
弗及前人。或請推治。琬曰。吾實不及前人。何推也。

### 忍字為上

唐王守和為光祿卿。未嘗與人有爭。嘗於案几間大  
書忍字。至於幃幌之屬。以繡為之。明皇知其姓字。非  
時引對。問曰。卿名守和。已知不爭。好書忍字。尤見用  
心。奏曰。臣聞堅則必斷。剛則必折。萬事之中。忍字為  
上。帝曰善。賜帛以旌之。

### 不問詆毀

宋富鄭公弼。少時有詆之者。如不聞。或告之。公曰。恐  
罵他人。曰。斥公名富某。公曰。安知天下無同姓名者。



忿心自消

或問品滎陽公希哲。為小人所詈辱。當何以處之。公曰。上為者知人與己本一。何者為詈。何者為辱。自然無忿怒心也。下為者且自思曰。我是何等人。彼為何等人。若是答他。却與此人等也。如此自處。忿心亦自消也。

更行一忍

東萊呂氏曰。忍之一字。眾妙之門。當官處事。尤是先務。若能清慎勤之外。更行一忍。何事不辦。書曰。必有

忍。其乃有濟。此處事之本也。諺有之曰。忍字敵災星。少陵詩曰。忍過事堪喜。此皆切於事理。為世大灑。非空言也。范文素嘗說喫得三斗醞醋。方做得宰相。蓋言忍受得事也。

艸廬忍卦

草廬忍卦。忍亨。初難。終吉。利君子貞。不利小丈夫。彖曰。忍。剛發乎內。柔制乎外。故亨。初若甚難。乃終有吉。唯君子為能動心忍性。不利小丈夫。其中淺也。象曰。忍在心上。忍。君子以含容成德。初一。小不忍則亂大



男訓卷十五  
五  
謀。象曰。小不克忍。成大亂也。次二。必有忍。其乃有濟。象曰。能忍於中。事克濟也。次三。一朝之忿。亡其身。以及其親。象曰。一朝之忿。至易忍也。亡身及親。禍孰大焉。次四。出於胯下。以成漢功。韓信以之。象曰。胯下之辱。小辱也。成漢之功。大功也。次五。張公藝九世同居。書一忍字。以對天子。象曰。同居之義。忍克致也。積而九世。有容德也。上六。氣血方剛。戒之在鬪。象曰。方剛之氣。忍則滅也。形而馬鬪。自求禍也。

### 筆疇忍戒

筆疇曰。書曰。必有容。德乃大。必有忍。乃有濟。君子立心。未有不成功於容忍。而敗於不容忍也。容則能恕人。忍則能耐事。一毫之拂。即勃然而怒。一事之違。即憤然而發。是無涵養之力。薄福之人也。是故大丈夫當容人。而不可為人容。當制欲。不可為欲制。觀婁師德丙吉之為人。則氣自平。而理自明矣。

### 文清格言

薛文清曰。聞人毀已。即艷色而怒。其量小甚矣。又曰。忍所不能忍。容所不能容。惟識量過人者能之。又曰。



必能忍人不能忍之觸忤。斯能為人不能為之事功。  
白沙忍箴

白沙箴云。七情之發。惟怒為遽。衆逆之加。惟忍為是。絕情實難。處逆非易。當怒火炎。以忍水制。忍之又忍。愈忍愈厲。過一百忍。為張公藝。不亂大謀。其乃有濟。  
文格忍箴

王文格治怒箴曰。有若撞搪。或干吾意。盛氣赫炎。如火斯熾。熾不傷物。乃先自燔。即愆於事。亦蓄其身。方其怒時。爾盍自思。彼其是耶。我怒奚為。彼且非耶。怒之則已。怒而不怒。弗留於已。譬彼熾火。沃以清泉。沃之沃之。火乃不然。明鏡在懸。其中湛若。是謂不遷。顏氏之學。



男訓卷十六

長厚類

凡二十五條

買金償亡

漢直不疑。南陽人。文帝時為郎。同舍有告歸者。誤持同舍郎金去。金主意不疑。不疑償之。後告歸者至。而歸金。亡金郎大慚。以此稱長者。

帝稱長者

漢劉昆。長厚不伐善。光武問之曰。前在江陵。反風滅火。後牧弘農。虎北渡河。行何德政。而致是事。昆對曰。



偶然耳。左右皆笑其質訥。帝嘆曰。此長者之言也。

### 寬罪餘福

漢袁安為河南尹。政尚嚴明。然未嘗以賊罪鞠人。嘗稱曰。凡學士者。高則望宰相。下則希牧守。錮於人聖世。吾所不忍為也。安後世為上公。史稱其仁心足以覃乎後昆。子孫之盛。不亦宜乎。

### 雅度能容

晉何隨字季業。敝衣蔬食。杜門著書。嘗有屠牽猪過隨門。索斷亡去。強認隨猪。即與之隣父。從園中盜莖。

隨出見之。恐盜慚怖。徐步而歸。其雅度類此。

### 容盜化俗

六朝范元琰字伯圭。錢唐人家。貧。治蔬為業。嘗出見盜。盜者遽退。母問故。曰。畏渠愧耻耳。或涉溝盜莖。琰伐木以度。自是盜者大慚。一鄉無復鼠竊。

### 安受人毀

北齊崔暹好薦人士。言邢邵宜親重。言論之際。邵遂毀暹。文襄不悅。謂暹曰。卿說子才長。子才專言卿短。此癡人也。暹曰。子才言暹短。暹說子才長。皆是實事。



不為癡也。

案文襄高澄謚子才邢邵字。

### 笑歸陳牒

唐戴至德為僕射。有老嫗欲詣劉仁軌陳牒。誤詣至德。至德覽未終。嫗曰。本謂是解事僕射。乃不解事僕射耶。歸我牒。至德笑而授之。

### 不顧知諧

唐狄梁公仁傑。巡撫河南。天授二年。為相。武后詔公曰。卿在汝南有善政。然有諧卿者。欲知之乎。公謝曰。陛下以為過。臣當改之。以為無過。臣之幸也。諧者乃

不顧知。后歎其長者。

### 緩刑罪吏

宋曹彬。太祖時知徐州。有吏犯罪當杖。逾年而後杖之。人莫知其故。彬曰。吾聞此人新娶。若即杖之。其舅姑必謂婦不宜家。而朝夕笞詈之。使不能自存。吾故緩其事。然濃亦未嘗屈焉。

### 積善興後

宋竇禹鈞。范陽人。為人素長者。有家童盜用房錢二百千。遁去。有女年十二三。自寫券繫女臂云。永賣此



女與本宅償負。禹鈞見而憐之。以其女囑妻曰。善撫養之。既笄。復以二百千擇配嫁之。僕聞父子圖禹鈞像。晨興拜祝。每歲所入。皆以濟人之急。家惟儉素。生五子。儀儼侃。侑僖。皆登第。至顯官。禹鈞年八十二卒。  
忘慢釋罪

宋徐鉉。字鼎臣。廣陵人。拜學士。嘗坐貶陝中。柳開為州刺史。頗慢鉉。開偶犯不法。詔鄭文寶治之。鄭乃鉉門生也。開詣鉉求解。卒以微言釋其事。一時稱鉉長者。

### 密薦寇準

宋王旦。真宗時為相。寇準為樞密使。準數短旦於帝。而且專稱準。及準罷樞密使。託人求為使相。旦驚曰。將相之任。豈可求邪。吾不受私請。準深憾之。既而除準武勝軍節度使。同中書門下平章事。準入見。謝曰。非陛下知臣。安能至此。帝具道旦薦準意。準媿嘆。以為不可及。

### 時稱厚德

宋文潞公彥博。仁宗時為相。御史唐介劾張堯佐。因



波及公。公出知許州。貶介英州別駕。及公許州被召。即上言。唐介前論臣事。雖有風聞之誤。然多中臣病。介未蒙召。臣不敢行。於是介得判潭州。尋至大用。時稱彥博為厚德。

### 保全屬吏

宋杜祁公衍。嘗言。今之在上者。多摘發下位小節。是不恕也。衍歷諸州提轉。安撫未嘗壞一官。其間不職者。即委以事。使之不暇偷惰。不慎者。諭以禍福。俾之自新。從而遷善者甚衆。不必繩以法也。

### 政去太甚

宋呂正獻公公著。議者或咎其持心太恕。今惡惡不盡。將失有罪。為異日患。公曰。為政去其太甚者耳。人才實難。當使之自新。豈宜使之自棄耶。

### 不念舊惡

宋呂許公夷簡。景祐中執政。范文正公仲淹。以天章閣待制知開封府。屢攻許公之短。坐落職。知饒州。後以天章閣待制知永興軍。尋改陝西都轉運使。會許公自大名復入相。對仁宗曰。范仲淹賢者。朝廷將用



之豈可復除舊職。即除龍圖閣直學士。陝西經畧安撫使。上以許公為長者。天下亦美許公不念舊惡。文正謂曰。向以公事忤犯相公。不意相公獎拔乃爾。許公曰。夷簡豈敢復以舊事為念耶。

### 不認遺金

張知常在上庠日。家以金十兩附至。同舍生乘公出發篋取之。學官集同舍校索。因得其金。公不認曰。非吾金也。同舍生至。夜袖以還公。公知其貧。以半遺之。前輩謂公遺人以金。人所能也。倉卒得金不認。人所不能也。

### 草制忘怨

陳恭公執中。素不喜歐陽文忠公。其知陳州時。文忠自穎移南京。過陳。拒而不見。後文忠還朝。作學士。恭公為首相。遂不造其門。已而恭公出知州。罷使相。換觀文。文忠當草制。恭公自謂必不得其美辭。至云杜門却掃。善避權勢。以遠嫌。處事執心。不為譽毀。而更節。恭公大驚喜。曰。使非與我相知深者。不能道此。此得我之實也。手錄一本。寄其門下客李中郎。曰。吾恨



不早識此人。

### 不怨諫官

宋羅拯性。和柔。不與人校曲直。神宗時。為發運使。時與副使公弼不協。公弼徙他道。御史劾其貸官錢。拯力為辨理。錢公輔為諫官。嘗論拯短。而公弼公輔。姻黨多在拯部內。往往薦進之。或譏以德報怨。拯曰。同僚不協。所見異也。諫官言事。職也。又何怨乎。時論服其長者。

### 宥死獲福

宋時。配崖州人。例以三百為率。過其數則推先到者於海。有南海太守憐之。奏於朝云。配罪所以不殺而宥之。遠方者。欲生之也。今推之於海。是復殺之矣。不若量移先到者入內地。以彰朝廷不殺之德。上可其奏。此太守無子。後生五男。皆登第。

### 不聽拓宅

宋趙逢龍。字應甫。鄞人。官侍講。致仕。丞相葉夢鼎出其門。嘗謂師宅卑陋。欲市其隣拓之。逢龍曰。隣里相安。一日驚擾。非吾所願。或問何以裕。後笑曰。吾憂子



孫學行不進。不患其饑寒也。

### 保全舊相

太祖嘗督責李丞相善長。憲使凌悅遂彈之。劉文成公為上言善長勲舊。且能輯和諸將。上曰。善長欲害汝者數矣。汝乃為之地耶。汝忠勲足任此。公頓首曰。是如易柱。必得大木乃可。若以小木為之。將速傾覆。臣駑鈍。豈堪此大任。其厚德不伐如此。案劉文成名基。

### 不挾舊怨

國朝尚書呂公震。每於上前稱夏忠靖公柔奸。一日震為子求官。上問公。公稱震有守城功。請與之。或謂公曰。彼昔奏公。公忘之耶。公曰。吾自得罪。彼何與焉。平江伯陳瑄。靖難時常欲害公。後公薦瑄總漕。又內贊其請以濟國事。二公深自敬服。

### 笞子不較

國朝章文懿先生。家於田居。諸子躬操器治農。邑令過訪。諸子輟耰跪迎。在司成。其子自金華徒步來省。道逢巡檢。笞之。已知請罪。公笑曰。吾子垢衣敝履。宜爾不識也。



男訓卷十六  
辭妾得子

國朝吳郡何彥。年老無子。遇相者謂壽盡明年。隣人聞之。聚財聘一少女。與彥為妾。何曰。既老且死。而娶人幼女。令不久孀居。縱有子。非所願也。其妻固勸。不從。遂為贅婿。而女之未幾。相者復遇。何曰。公非但不死。而壽復可延。有陰騭故也。後果不死。其妻復生一男。

男訓卷十六終

男訓卷十七

信實類 凡十條

一言見信

季路字仲由。平生忠信。小邾射以勾繹奔魯。曰。使季路要我。吾無盟矣。使子路。子路辭。季康子使冉有謂之曰。千乘之國。不信其盟。而信子之言。子何辱焉。對曰。魯有事於小邾。不敢問故。死其城下。可也。彼不臣而濟其言。是義之也。由弗能。

口不二價



漢韓康嘗採藥名山賣於長安市口不二價三十餘年有女子從康買藥守藥價不移女子怒曰公是韓伯休耶乃不二價乎康歎曰我本欲避名今女子皆知有我遂入霸陵山中

### 千里期信

後漢范式字巨卿山陽金鄉人少遊太學與汝南張劭為友劭字伯元二人並告歸鄉里式謂劭曰後二年當過拜尊親見汝子焉至期伯元具以白母請設饌以俟母曰二年之別千里結言爾何信之審也對曰巨卿信士必不乖違母曰若然當為醞酒巨卿果到升堂拜母盡歡而別

### 不欺兒童

漢郭汲在并州行部到美稷有兒童數百騎竹馬迎拜問使君何日當還汲計日告之既還先期一日乃止野亭須期而入

### 冒死認罪

後魏高允字伯恭蓀人太武時為太子傅嘗與崔浩同修國史浩以不諱國惡被收當死太子謂允曰至



尊脫有問。當言浩獨為之。帝詔問曰。國史皆浩所為乎。允對曰。臣與浩共為之。然浩惟總裁耳。至於著述。臣多於浩。帝怒曰。允罪甚浩。何以得生。景獻懼曰。天威嚴重。允小臣。迷亂失次耳。帝問允。信如東宮言乎。對曰。臣罪當族。殿下以臣侍講日久。欲乞其生耳。帝顧太子曰。直哉此人。臨死不易辭。信也。為臣不欺君貞也。特赦之。景獻。魏太子謚。

千里如期

唐卓恕字公行。上虞人。為人篤信。言不宿諾。與人期約。雖暴風疾雨。雷電冰雪。未嘗或爽。嘗從建業還家。辭太傅諸葛恪。恪問何日當來。對曰。某日當親覲。至日。恪為主人。停不飲食。以須恕至。時賓客會者。皆以為會稽建業。相去千里。道阻江湖。風波難必。豈得如期。須臾。恕至。一座盡驚。

路期不爽

蕭至忠。武則天時。為秘書少監。年少時。與友人期於路。偶會風雪凍冽。諸人皆奔避就宇下。至忠曰。寧有與人期而求安失信乎。友至。乃去。眾咸嘆服。



飲酒言實

宋魯宗道字貫之。亳州人。真宗時。為諭德。嘗遣使召之。宗道方與鄉人飲酒肆中。謂使者曰。第以實告。飲酒人之常情。欺君。臣子之大罪。使者如其言。上嘉忠實。拜叅知政事。舉朝憚之。目為魚頭叅政。

終身不欺

賈黯字直儒。及第後。歸鄧州。范文正公為守。謁文正曰。某晚進。偶登科第。願受一言之教。文正曰。君不憂不顯。惟不欺二字。可以終身行之。賈公記其言不忘。每語人曰。吾得於范公者。終身用之不盡也。

因問自責

陳忠肅公雖閑居。容止必莊。言不苟發。盛夏見子孫輩。未嘗不正衣冠。一日與家人語。家人問是實否。公退自責者累日。曰。豈吾常欺於人。何為有此問也。



男訓卷十八

聰敏類

凡十七條

不受遺粟

鄭子陽為相。或告曰。列禦寇有道之士。居君之國而窮。無乃不好士乎。乃遺粟數十乘。禦寇再拜而辭。其妻不悅。禦寇曰。子陽非自知我也。以人之言而遺我粟。至其罪我也。又且以人之言。此吾所以不受也。無何。鄭人殺子陽。其黨皆死。而禦寇獨全。

諫止寫書



漢吳祐字季英長垣人父恢南海太守欲以殺青簡  
寫圖經祐時十餘歲諫曰此書若成則載之無兩吾  
恐馬援以薏苡得謗王陽以衣囊微名嫌疑之際所  
當慎也恢喜曰吳氏代不乏季子矣

### 代對月食

漢黃琬字子琰瓊孫建和初正月日食京師不見而  
瓊為魏郡守以狀聞詔問所食多少瓊不能對琬時  
七歲在旁曰何不言日食之餘如月之初瓊大驚

### 字父不拜

魏常林字伯槐年七歲有父黨造門問林伯先在否  
林不答客曰何不拜林曰雖當下拜臨子字父何拜  
之有

### 道旁苦李

晉王戎幼與群兒戲於道側見李樹多實等輩競取  
之戎獨不往或問其故戎曰樹在道邊而多子必苦  
李也取之信然

### 提戈取印

宋曹彬字國華始生週歲日父母以百玩具羅於前



試其所取。彬左手提干戈。右手取俎豆。斯須取一印。餘無所視。後果為樞密使。

### 倉卒弭亂

宋張乖崖守蜀。兵火之餘。人懷反側。一日大閱。方出軍。衆忽蒿呼。乖崖亦下馬隨衆。東北望。三呼攬轡復行。衆不敢譴。乖崖名詠。

### 灌水取毬

宋潞公文彥博。字寬夫。幼時與群兒擊毬。毬入柱穴中。衆不能出。公以水灌之。毬浮出。其卓識如此。

### 從容應變

文潞公知成都。大雪。會客。帳下卒有諍語。共拆井亭。燒以禦寒。軍將以聞。徐曰。今夜誠寒。亭壞矣。正欲改造。更有一亭。可盡拆為薪。樂飲如常。明日乃究問。先拆亭者杖而流之。

### 知孔子兄

宋劉恕。字道原。少穎悟。俊拔。讀書過目成誦。年四歲。坐客有言孔子無兄弟者。恕即應聲曰。以其兄之子妻之。一座驚異。



擊甕出兒

宋司馬光字君實。幼與群兒戲。一兒墮水甕中。群兒驚走。不能救。公取石破其甕。兒得出。識者已知公之仁智不凡矣。

買飯餉軍

宋嘉熹間。江西峒丁反。吉州萬安宰黃炳。鳩兵守備。一日五更。探報寇且至。炳亟遣巡尉領兵迎敵。衆皆以空腹。柰何。炳曰。第速行。飯即至矣。乃使吏卒携竹籬木桶。分沿市民之門。曰。知縣買飯。人家晨炊方熟。厚酬其直。負之以行。於是士卒皆飽。一戰破寇。

孝通經義

宋朱熹字元晦。八歲通孝經大義。書大字於其上。曰。若不如。此便不成人。從群兒嬉戲。獨以沙排八卦。端坐默視。後通易學。登第。遂成大儒。

總角定亂

宋趙葵字南仲。衡山人。父方嘗夢南嶽神降其家。乃生葵。一日方擣將士。賞不償勞。軍欲造變。葵時卅角。從旁亟呼曰。此朝廷賜也。本司別自有賞。軍心乃定。



人報其機。監後拜相。屢立奇功。朝廷倚以為重者二十年。

### 穎悟非常

元許衡字仲平。幼端慤。與群兒嬉戲。即有坐作進退周旋之節。群兒莫敢犯。年七八歲。受學鄉師。書過目輒不忘。一日問其師曰。讀書欲何為。師曰。應舉科第耳。曰。如斯而已乎。師太奇之。謂衡父曰。此兒穎悟非常。他日必有大過人者。吾不能為之師矣。固辭而去。衡得程朱氏書。沉潛玩味。造詣淵深。

### 不取非有

許衡少時。嘗暑中過河陽。渴甚。道有梨。眾爭取啖之。衡獨危坐樹下自若。或問之曰。非所有而取之。不可也。人謂世亂。此無主。衡曰。梨無主。吾心獨無主乎。

### 懸料奸謀

永樂八年。阿魯台歸款。欲并女直。吐蕃東西諸部落。聽其約束。請

朝廷出誓詞。眾議宜從之。黃文簡公言。夷虜勢分易制。併力一心。後患滋大。此奸謀不可許。



文皇善公言。顧左右曰。淮如立高岡。遠覽爾輩。直在平地。見目前耳。

男訓卷十八終

男訓卷十九

謙抑類 凡十條

慎無驕人

周公使其子伯禽就封於魯。戒之曰。我文王之子。武王之弟。今王之叔父。我於天下。亦不賤矣。然我一沐三握髮。一飯三吐哺。如此待士。猶恐失天下之賢人。子之魯國。慎無以國驕人。

不矜顯貴

六朝沈慶之。字弘先。武康人。以司空致仕。柳元景。顏



男訓卷十九  
師伯造訪。鳴笳列卒滿道。慶之在田間見之。曰。吾與公並起貧賤。一時顯貴至此。惟當共思損抑。車服之盛。何為乎。挿杖而耘。不顧方其未遇。鄉里輕之。後見皆膝行而前。慶之曰。故是昔時沈公安用如此。

### 聖人教謙

唐孔穎達。孔子耳孫也。帝問孔子稱以能問於不能。以多問於寡。有若無。實若虛。何謂也。對曰。此聖人教人謙耳。已雖能。就不能之人。以容所未能。已雖多聞。見復就所寡之人。以資其多。內有道。外若無。中雖實。容若虛。非特匹夫為然。即君德亦爾。帝善其對。

### 無出人上

唐李勣戒劉延祐曰。子春秋少而有美名。宜稍自謙退。無為出人上。以招忌諱。延祐深納其言。

### 訓子弟格言

唐朱仁軌字德容。永城人。隱居養親。誨子弟曰。終身遜路。不枉百步。終身遜畔。不失一段。謚孝友先生。

### 辭作詩賦

五代李懌。京兆人。官學士時。張文寶知貢舉。所收士



有覆落者。乃詔學士院作詩賦為貢舉格。命懌為之。笑曰。余少登科。蓋偶然爾。假令余復就禮部試。未必不落。安能與英俊作式。聞者多其知體。

### 引車避朝紳

宋曹武惠王彬。字國華。為樞密使。兼領將相。其榮寵人臣無二。不以爵祿自大。凡造門之士。皆降廡而揖。吏白事。雖劇暑。不冠不見。為藩帥。中途遇朝紳。必引車趨避。過市中。戢其傳呼。戒導吏馬不越十輪。恐墮。過市井。清素若儒生。宅帑無十日之蓄。至坐武帳。止衣弋綈紵絮而已。

### 不取怨於人

宋李文正公昉。字明遠。為相時。有人以事相干請。見其人材可擢用者。必正色拒之。或材不足收用者。必和顏溫語慰待之。子弟問其故。公曰。用賢。人主之事。我若私受其請。是市恩也。故峻絕之。使其恩歸於上。若其不用者。既失所望矣。又無善言以解之。此取怨之道也。

### 讓賢成功



宋韓公琦以招討使左遷秦州。時范公仲淹亦罷師命。王公堯臣克陝西節度。具言二公為西虜所畏。當請還之。忤執政意。不行。元昊復叛。仁宗乃用堯臣言。召還二公。議者謂保全關輔。雖韓范之功。然非王公亦不能成也。

### 抗禮引坐客

宋富文忠公弼。為人溫良寬厚。自唐以來。宰相謂之禮絕百僚。見者無崇卑皆拜。宰相平立。少垂手接之。送客未嘗下階。客坐稍久。則吏從傍唱相公尊重客。公稍效之。



男訓卷二十

儉素類

凡十七條

帝賜帷帳

後漢宣秉字巨公。馮翊雲陽人。為御史中丞。遷司隸校尉。秉性節約。所用不過布衣蔬食瓦器而已。帝嘗幸其第。見其器物。嘆曰。楚國二龔。不如雲陽宣巨公。即賜帛帷。以勵清苦之臣。

聞風自化

唐楊綰性儉素。始輔政時。御史中丞崔寬雅尚豪侈。



城南別墅。池觀堂皇。為當時第一。聞綰相。即日遣人毀之。京兆尹黎幹。出入從騶以百數。即損去。才留十餘騎。中書令郭子儀。在邠州行營。方大會。除書至。減坐中音樂五之四。其它聞風靡然自化者。不可勝紀。

### 儉德折奸

唐杜黃裳。字遵素。杜陵人。入叅大政。李師古嚴憚之。遣一幹吏携千緡候其門。有綠輿出。從婢二青衣。繼縷言是相公夫人。吏遂歸告師古。師古折其謀。終身不敢改節。

### 磁樽漆器

唐錢武肅王鏐。衾被衣服悉用細布。自非公用。惟磁樽漆器而已。其愛妃恭穆氏。嘗以王寢帳綻裂。乃更置青練帳。將易之。王曰。作濃於儉。猶恐為奢。但慮後代皆施錦綉。爾卒不用。

### 綈袍胡床

宋曹武惠王彬。再總樞密。五守藩屏。位雖高。志常自下。不蓄贏餘。為子孫計。所居之宅。僅蔽風雨。敗簷踈牖。不堪其憂。而彬處之恬然自若。後為主帥。膺戎寄。



晝訓練。夜警巡。衣弋絺袍。坐素木胡床。暨諸賓。從環坐於野。衆笑曰。豈有國戚重臣。乃簡儉如此。彬終不少侈。

### 居第隘陋

宋李文靖公沆為相。自奉甚薄。所居陋巷。家無重門。家人勸治居第。沆曰。身食厚祿。時有橫楊。計囊裝亦足為此。但人生朝暮不可保。又豈能久處華屋之下哉。巢林一枝。即自足耳。復何為有土木侈心耶。既而治第於封丘門內。廳事前。僅容旋馬。或言其太隘。公笑曰。居第當傳子孫。此為宰相廳事。誠隘。為太祝奉禮廳事。則已寬矣。

### 寢止一幃

宋寇萊公準。初為樞密直學士。賞賜金帛甚厚。乳母泣曰。太夫人不幸時。家貧。求一縑作衾。不可得。豈知今日富貴哉。公聞之。慟哭。盡散金帛與宗族。故舊。終身不蓄財產。後雖出入將相。所得祿俸。惟務施與。公外奢內儉。絕聲色之娛。寢處止一青幃。二十餘年。時時有破壞。益命補葺。或以公孫私事譏之。答曰。彼



詐我誠。雖敝何憂。且不忍處之久。而以敝復弃也。其人大愧。

食止一器

宋查道以謹儉律已。為待制時。每食止取足一味。雖蔬茹亦然。常曰。福當如是愛惜。

為相儉約

宋杜祁公衍為相。食惟一麪一飯而已。或美其儉。公曰。衍本一措大爾。名位服用。皆國家有。俸入之餘。以給親族之貧者。常恐浮食。焉敢以自奉也。一旦名位

爵祿。國家奪之。却為一措大。又將何以自奉。養邪。

費事相稱

宋范仲淹嘗自言曰。吾每夜就寢。輒計一日飲食奉養之費。及晝所欲為之事。若相稱。則鼾睡熟寐。無復他念。苟或不然。則終夜不能安枕。

一爵一肉

蘇東坡在黃州。嘗書云。自今日已往。早晚飲食。不過一爵一肉。或有尊客盛饌。則三之。可損不可增。有召我者。預以此告之。慎勿令人他費。一曰安分以養福。



二曰寬胃以養氣。三曰省費以養財。

### 日用限錢

宋蘇東坡謫齊安。日用錢不過五十。每月朔取錢四千五百。斷為三十塊。掛屋梁上。平旦以杖挑取一塊。即藏去杖。又以竹筒貯用不盡之錢。以待賓客云。

### 疏斥侈用

宋仇泰然守四明。與一幙官極相得。一日問及公家日用多少。對以十口之家。日用千錢。泰然曰。何用許多。曰。早具少肉。晚菜羹。泰然驚曰。某為太守。常不敢食肉。只是喫菜。公為小官。乃敢食肉。定非廉吏。自爾見踈。

### 齏鹽風味

宋張無垢云。余平生貧困。處之亦自有法。每日用度。不過數十錢。亦足。至今不易也。有客自萊陽來。言鄭亨仲日以數十錢懸壁間。椒桂葱薑皆約以一二錢。曰。吾平生貧苦。晚年登第。稍覺快意。便成奇禍。今學張子韶法。要見舊時齏鹽風味。美甚。長久也。張無垢名九成。子韶。即無垢字。



元衡儉說

季元衡儉說云。與其貪饕以招辱。不若儉而守廉。干請以犯義。不若儉而全節。侵牟以聚仇。不若儉而養福。放肆而逐欲。不若儉而安性。常舉以示諸子孫。

儉素遺後

國朝宋文憲公濂。事我

太祖。寵眷賜賚甚隆。公平居布衣蔬食。無異貧士。或勸為子孫計。公曰。富貴豈一家物哉。我乃所以遺之也。

愛惜故紙

國朝葉文莊公云。常見胡昆陵應酬詩文稿。皆片紙滿書。聞其雖破紙少許。見輒用補窓罅。不棄也。王塩山。凡屬公牒稿。皆用所受外封。既謄畢。即以作繩絞。仍漬以剩蠟。俾照夜。予每作書牘。或寫鄙作。字悞塗改。及有所更易。輒令人洗。不忍易他紙。葉文莊。名盛。胡昆陵。名湜。王塩山。名翺。



男訓卷二十一

廉潔類

凡二十九條

不貪為寶

鄭罕虎字子皮。一稱子罕。鄭大夫。有獻王者。郤之曰。爾以玉為寶。我以不貪為寶。若受之。皆喪寶也。不若人有其寶。及卒。子產哭之曰。吾無與為善矣。

三相無積

春秋季文子卒。宰治其家事。為喪具。室無衣帛之妾。廐無食粟之馬。藏無金玉。器無重備。君子以是知季



文子忠於公室也。相三君矣。而無私積。可不謂忠乎。  
姑臧脂潤

漢孔奮。字君魚。右扶風人。守姑臧長。奉母孝。每食必先甘毳。妻子食葱韭而已。或笑奮曰。置脂膏中。不能自潤。而奮終不改。

不受縣給

漢閔貢。字仲叔。太原人。老病家貧。不能得肉。日買猪肝一片。屠者或不肯與。安邑令勅吏給之。或問其故。嘆曰。閔仲叔豈以口腹累安邑耶。遂移去。

投珠遠穢

漢鐘離意。字子阿。山陰人。累官尚書。交趾守張恢墨敗。籍其貲。詔賜臣下。意得珠。悉以委地。曰。穢物不敢拜。帝歎曰。清乎尚書之言。

夜畏四知

漢楊震。字伯起。弘農郡人。性公廉。不受私謁。子孫常蔬食步行。故舊長者。或欲令為開產業。以遺後人。震不肯。曰。使後世稱為清白吏子孫。以此遺之。不亦厚乎。先為東萊太守。道經昌邑。令王密。故所舉荊州茂



才。夜懷金十斤以遺震。震曰。故人知君。君不知故人。何也。密曰。暮夜無知者。震曰。天知地知。子知我知。何謂無知。密慚而去。

### 石堅蘭香

漢廉范。字叔度。年十五。至蜀迎祖母喪。及到葭萌。船沒。幾死。魚腹。太守張穆出筒中布以與范。范曰。石性堅。蘭性芳。前後相違。不忍行也。遂不受。

### 不受遺麥

漢范丹。字史雲。外黃人。常使兒捃麥。得五斛。鄉人道之一斛。屬兒曰。莫令尊君知。兒歸。白其父。丹即令并還其六斛。言麥已雜。遂不取。為萊蕪縣令。民歌之曰。甑中生塵。范史雲。釜中生魚。范萊蕪。

### 懸魚於庭

漢羊續。字興祖。泰山人。為廬江太守。卧一幅布。綯年久盡壞。以敗紙糊之。復為南陽太守。初之郡。府丞嘗獻生魚。續受而懸之於庭。丞後又進之。續乃出所懸者。以杜其意。自後丞不敢復有所遺。

### 父子雙清



晉胡威字伯虎。少志尚清白。歷位宰牧。武帝宴見。嘗嘆其父清節。因謂威曰。卿清白孰與卿父。威對曰。臣不如臣父也。帝曰。何為不如。對曰。臣父清。恐人知。臣清。恐人不知。是臣不如遠矣。

題詩厲操

晉吳隱之。廣州刺史。先是官嶺南者。皆黷貨。故朝廷推隱之境。有貪泉。酌而飲之。賦詩云。人言飲此水。一挿懷黃金。試使夷齊飲。終當不易心。蓋自况也。及歸。妻劉氏取沉香一片。隱之命投諸江。

遺子清白

唐房彥謙字孝冲。有清節。常謂其子玄齡曰。人皆因祿富。我獨以官貧。以遺子孫。在於清白耳。玄齡奉其訓。為貞觀名相。

敝車羸馬

唐賈敦頤。曹州人也。貞觀朝。遷滄州刺史。在職以清廉著。每入朝。盡室而行。惟敝車一乘。羸馬數匹。啣勒有關。以繩代之。見者不知其為刺史也。

餉鹿瘞巖



唐裴寬字長寬潤州參軍。一日刺史韋詵登樓見人於後圃有所瘞藏者。訪是裴居。問狀答曰。寬義不以苞苴入家。適有餉鹿者。致而去。不敢自欺。故瘞之爾。詵嗟異。妻以女。仕至尚書。

### 斷事引燈

唐皇甫無逸為益州長史。嘗夜宿人家。遇燈炷盡。主人將續之。無逸抽佩刀斷衣帶以為注。

### 明鏡照心

唐馮履謙補河北尉。有部人張懷道任江陽尉。與謙有舊。貽鏡一面。謙集寮屬遍視之。曰。此張公所致也。即與之。有舊。吾効官。以俸祿自守。豈私受遺哉。昌言曰。清水鑑貌。明鏡照心。余之効官。必至于此。復書于使者。乃歸之。

### 受綾不發

唐韓思復字紹出。長安人。少失父。兒時。母為語父亡狀。嗚咽欲死。舉茂才高第。家益貧。杜瑾以百綾餉思。復方併日食。而百綾完。封不發。累遷襄州刺史。治行名天下。



羊裘負薪

甄彬常以一束苧就長沙寺庫質錢後贖苧還於苧東中得金五兩以物裹之彬得之還其質主道人大驚云近有人以此金質錢時有事不得舉而失之檀越乃能見還輒以金半相酬往復十餘彬堅然不受曰五月披羊裘而負薪豈拾遺金者乎

屏去龜鶴

宋趙獻公忬初任成都携一龜一鶴以行及再任屏去龜鶴上一蒼頭執事張學士裕送以詩曰馬諳舊路行來滑龜放長江不再來自成都召還知諫院神宗謂之曰聞卿匹馬入蜀以一琴一鶴自隨為政簡易亦稱是耶

不受金楪

宋程伊川見韓侍郎維於穎川韓館之早晚同食一日韓密謂其子彬叔曰先生遠來無以為意今有黃金藥楪一似可為先生壽未敢遽言之我當以他事出使汝侍食從容道吾意彬叔如戒啟之伊川曰願與乃翁道義交故不遠而來奚以此為詰朝遂歸持



國曰。我不敢言。正為此耳。持國。即韓維字。

### 懷金不獻

宋傅欽之侍郎。求介秦觀以見陳師道。知其甚貧。因懷金餽之。及觀其貌。聽其論議。竟不敢出口而去。

### 不受石硯

宋孫之翰。人嘗送一硯。值錢三千文。之翰曰。硯有何異。如此之價也。客曰。硯以石潤為寶。此石呵之則水流。翰曰。一擔水。纔值一文錢。何以此為。遂不受。

### 兄弟清白

宋李綸。字世美。提舉廣東。適伯兄維守息平。酌別江上。兄弟相礪以清白。綸曰。倘負君民。有如此水。遂投杯于江。杯停不沒者久之。觀者驚歎。

### 題詩却餽

國朝吳文恪公訥。

仁廟時。拜監察御史。巡按貴州還。三司遣人以黃金百兩追送至夔府。訥不啟封。就題詩其上。還之。云。蕭蕭行李向東還。要過前途最險灘。若有賊私并土物。任教沉在碧波間。其廉而不激如此。又襄城伯李公。



素與公厚善。臨行李以紫貂裘帽及白金百兩為贈。公悉不受。

### 難中却餽

國朝劉東山公。自入仕以來。不營田宅之利。官至大司馬。不為子孫求恩澤。忤劉瑾被逮。故人贈遺皆謝絕。不受。謫肅州。貧無所資。藩臬諸司畏瑾。不敢館穀。三學生徒相繼食之。其清約如此。東山名大夏。

### 王公儉德

國朝耿公裕為禮部尚書時。嘗曰。吾暮自部歸。必經過三原之門。見其老蒼頭。每持罐買油。吾自入仕。未嘗買油。甚媿焉。故每過。輒面城而行。又朝士嘗言公之子。自三原來京省公。只騎一騾。不費驛遞一錢。

### 粟罄不顧

國朝羅文毅公倫。罷脩撰家居。貧甚。或衣之衣。行遇乞人死於途。輒解以覆之。客晨至。留且飯。妻語其子曰。瓶粟罄矣。之旁舍干之。比舉火。日已近午。亦曠然不以為意。

### 家世清操



國朝朱公裳。少勵清節。為諸生。衣食不續。裕如也。御史顧潛試士。知其賢。檄府守資之。不受。俾學於京師。無僕從。自炊汲。同門生或辦甘脆。邀之。必却。登進士。積官至九卿。寒約如一日。自都御史守制還。居無賓堂。土壁席門。自奉嘗茹菜。連旬無肉食。為御史。按山東山西。有風采。人稱為長齋御史。後為浙江副使。冬夏惟紗帽袍各一。夫人荆釵布裙。親操炊汲。迎父就養。同列知其貧。共制衣一襲為壽。公父力卻之。蓋其家教如此。

小臣廉節

國朝許熙載為貧謀養。不擇祿仕。僦屋以居。糶市以食。親故嘗斬之曰。君位劣祿薄。親年又高。何為狷介。至是許笑曰。為臣當廉。何有大小。記獨不云小臣廉乎。



國

銅川  
藏書

卷之三十一

九



